

Մարտ 15-ին հաշվեյարդարի ենթարկեց բժաւոր տիֆի դէմ պայքարող արտակարգ յանձնախումբը. համաճարակը այլևս վերջացած էր:

Կառավարութեան յատուկ ուշադրութեան առարկայ էր երկաթուղու բարեկարգման գործը, որի համար դրսից հրաւիրեցին ձեռնհաս մասնագէտներ. բացեցին խոշոր վարկեր, ձեռք բերեցին անհրաժեշտ նիւթեր: Փետր. 15-ին Հանրապետութեան երկաթուղիները ընդհանուր կառավարիչ նշանակեց յայտնի մասնագէտ ինժ. Միքայէլ Օզանէզեանը, սպասարկութեան պետ՝ ինժ. Մ. Ալիբէզեանը, ուրիշ պաշտօնները՝ ինժ. Արշ. Պիշիկեանը, ինժ. Բ. Փիրումեանը: Մարտից սկսած երկաթուղային վարչութեան կենտրոնը փոխադրեց Ալեքսանդրապոլ: Ապր. 29-ին յատկացեց 11,230,537ռ. երկաթուղիները, կայարանները և երկաթուղային շէնքերը վերանորոգելու համար:

Համեմատաբար, թոյլ էր ընթանում պարենաւորման գործը: Պարենաւորման նախարարութեան մէջ ստեղծուել էր բազմիշխանութիւն. նախարար Լ. Ղուլեանը և պաշտօնակատար Ս. Յարութիւնեանը Թիֆլիսում և Ս. Յարութիւնեանի պաշտօնակատար Գ. Մելիք-Ղարազէոգեանը՝ Երևանում միաժամանակ կարգադրութիւններ էին անում, որոնք, յաճախ, խաչաձևում էին իրար և առաջ էին բերում իրաւացի դժգոհութիւն ու գանգատներ Գ. Մելիք-Ղարազէոգեանի կողմից: Վերջինս փետր. 2-ին նախարարական խորհրդի նիստում հարց յարուցեց, թէ պէտք է միջոցներ ձեռք առնել՝ վերացնելու համար բազմիշխանութիւնը: Յայտարարեց, թէ պարենաւորման նոր նախարար է հրաւիրւած և շուտով դալու է Քր. Վերմիշեանը, սակայն, Վերմիշեանը դեռ երկար չեքեաց Երևանում, իսկ պարենաւորման գործերը երթալով՝ աւելի և աւելի խճողում էին: Փետր. 25-ին Մելիք-Ղարազէոգեանը նորից գանգատ ներկայացրեց Ս. Յարութիւնեանի քայլերի դէմ և հարց դրեց, թէ՛ արգեօք ինքը պարտաւոր է ենթարկուել նրա հրահանգներին. կառավարութիւնը որոշեց, որ պարենաւորման նախարարութեան վերաբերմամբ Մելիք-Ղարազէոգեանից գատ ուրիշ ոչ ոք կարգադրութիւններ անելու իրաւունք չունի: Այսպէս տեւեց դրութիւնը, մինչև որ մարտ 1-ին պարենաւորման նախարար նշանակեց Քր. Վերմիշեանը: Պարենաւորման տագնապի դէմ պայքարելու նպատակով, մարտ 26-ին, յատկացեց 50 միլիոն ռուբլի գիւղացիութեան սերմացու հայթայթելու համար:

Կառավարութեան կազմի մէջ եղան և ուրիշ փոփոխութիւններ. մարտ 27-ին զինւորական նախարարի պաշտօնից հրաժարեց գոր. Յ. Հախվերդեանը և նոյն օրը նրա փոխարէն նշանակեց գնդ. Քր. Արարատեանը՝ բարձրացելով միաժամանակ գորավարի աստիճանի: Զինւորական նախարարի օգնական նշանակեց Դրօն: Ապր. 25-ին կազմեց զինւորական խորհուրդ, որի նախագահ կարգեց գոր. Թ. Նազարբէզեանը, անդամներ՝ գոր. Յ. Հախվերդեանը և գոր. Յ. Բաղրամեանը: Զօր. Նազարբէզեանին յանձնեց և Հայաստանի բանակի սպարապետութիւնը: